

89/163


EX LIBRIS

49 / 163




LABOR OMNIA VINCIT IMPROBUS










4700 n














*done*  
**L'ASSASSINAT**  
**ET PARRICIDE COMMIS EN**  
**LA PERSONNE DV TRESCHRESTIEN,**  
& tresillustre Roy de France & de Polo-  
gne, Henry troisieme du  
nom.

**A V E C**

**LA COPPIE DES LETTRES DE**  
*sa Majesté, escrites au Comte de Montbeliard*  
*depuis sa blessure*

\*\*\*



Imprimé à Metz, par ABRAHAM  
FABER.

1589.

Case 22

F

39

.326

158925

THE NEWBERRY  
LIBRARY



L'ASSASSINAT ET PARRI-  
CIDE COMMIS EN LA PERSONNE DV  
treschrestien, & tresillustre Roy de France &  
de Pologne, Henry troisieme  
du nom.



Il y a tousiours quelque signe  
qui precede les orages pro-  
chains, & iamais les tempestes  
n'arriuent quilz ne soient de-  
noncez. Si nous considerons  
aussi le malheur de la perte de  
nostre bon Roy, certes il ne nous a surpris sans  
qu'au parauât nous n'en ayons eu de tresgran-  
de apparance: La ligue l'auoit extremement  
offencé, la grauité du delit la faisoit entrer en  
deffiance de sa clemence, l'incredulité ouuroit  
en elle la mesme porte au desespoir par ou y  
entroit la haine, & en sortoit la foy. Et c'este  
cy, comme l'ame, ne retournant jamais du lieu

d'ou elle part, laissa ce party abandonné à toutes sortes de crime, & capable en fin du maudit assassinat qui priue la France d'un Roy le plus debonnaire qui regna jamais. Ainsi l'infidelité du peuple rebelle, & sa reuolte contre son Prince, duquel l'innocence est mise en but à l'outrage, & persecutée par l'ingratitude de ceux qui luy auoient plus d'obligation, de deuoir & de respect, nous deuient bien estre presages affeurez de quelque accident prodigieux, pour nous faire tenir à l'erte, & preueoir le malheur aduenu, affin dy pourueoir, si Dieu l'eut permis: Mais la grandeur de nos pechez l'ayant irrité contre nous est cause que nous soyons preuenus sans consideration de ces signes precedens, & qu'en l'esprit des bons François est faite ceste blessure, qui entre toutes est incurable: Et certes elle est incurable par l'accident de l'assassinat commis comme s'ensuit.

Messieurs de Longueuille, & de la Noue, ayant ioint les troupes de Champagne, & recueilly es enuiron de Chastillon sur Seine les Suisses & Lansquenetz, cōduitz par Monsieur de Sancy, & fait de tout vn corps d'armee de vingt mil hommes & plus, passerent à Poissy la riuere de Seine, pour veoir le Roy qui battoit Pontoise, & qui le lendemain vingtcinquieme Iuillet l'ayant receti à composition, moyennât deux cent mille escus, & la deliurance qui luy fut faite des plus mutins & seditieux, pour leur  
faire



faire receuoir punition exemplaire, alla avec le Roy de Nauarre bien-veigner ladicte armee de Suisses, qui l'attendoit en ordonnance de bataille. Sa Majesté la trouua si belle qu'elle voulut passer par tous les escadrons, avec tant de demonstratiō de contentemēt, de resiouissance, & de caresses aux Chefs, que tous, iusques aux moindres des Soldats, se firent cognoistre pleins de zele & de volonté de fidelement seruir & supporter, avec beaucoup de courage, les fatigues de la guerre, & ses incommoditez. Le penultiesme du moys il la ioingnit au reste de ses forces: & de tout fut l'armee fortifiee iusques au dessus de quarante cinq mil homes. Elle passa vers Paris du costé du Pont saint Clou, que sa Maieité forcea incontīnēt à coups de Canons: mais le malheur voulut qu'y estant logee vn ieune Iacobi, aagé de vingt deux à vingt trois ans, pratiqué de longue main par ceux qui preuoyoient, du bon succez des affaires de sa Majesté, couler l'auoisiement de leur ruine ineuitable, choisit l'opportunité de s'y presenter, & le premier iour d'Aoust s'estant adressé au Procureur General de la court de Parlement, & qui s'en dit estre fugitif pour estre bon seruiteur du Roy, se descourrit auoir quelque fait d'importance, qui ne pouuoit n'y deuoit estre communiqué à autre qu'à sa Majesté mesme: qu'il scauoit bien donner libre accez à tous ceux qui sous l'habit de Religieux

se disent estre voüez au seruice de dieu, en quoi il ne se mesprenoit : car s'il y eut iamais Prince qui portast reuerence à gens d'Eglise sa Majesté en estoit l'un, & ne se peut dire qu'il se vit onc aucün Ecclesiastique se departir d'elle malcontent. Pleust à Dieu que ce zele eut eu quelque peu moins d'ardeur, il n'eut facilité à ses ennemis l'execution de leurs damnables desseins, & ce malheureux n'eut esté si legerement introduit.

Le Roy donc ayant entendu qu'il auoit lettres du Sieur de Harlai, son premier President en la court de Parlement de Paris, & creance de sa part, selon qu'il ayme ce personnage, duquel l'integrité & la foy sont sceillez du long emprisonnement en la Bastille, fit appeller le Religieux en sa Chambre ou il n'y auoit autre que le Sieur de Bellegarde, premier Gentilhomme d'icelle, & ledit Procureur, que sa Majesté fist mesme retirer, estimant deuoir apprédre quelque chose de bien secret, attendu la demonstration qu'en faisoit ce detestable hypocrite, qui se voyant seul, & l'occasion en main, assurant sa contenance le mieux qu'il luy fut possible, tira d'une de ses manches vn papier qu'il presenta au Roy, & de l'autre vn cousteau, duquel avec violence, il donna vn coup à costé du petit ventre de sa Majesté, attentifue à la lecture, & laquelle neantmoins se sentant griefuement blessée retira de la playe le cousteau, que  
ce mal-

ce malheureux y auoit laissé, en donna vn coup au dessus de l'œil à ce maudit Apostat, fuscité du diable, qui fut le premier chastiment qui luy fut donné, suiuy au mesme temps de la mort, laquelle il receut trop honorablement de la main de plusieurs Gentilshommes qui y accoururent.

Le Roy fut porté en son lit, & les Medicins & Chirurgiens appelez lui fut appliqué le premier appareil, & la playe iugée non mortelle : dont sa Majesté fit escrire & donner aduis de l'attentat, & de l'esperoir de sa briefue guerison, à tous ses bōs & fideles seruiteurs les Gouverneurs des Prouinces, ses Lieutenans, & autres Officiers: voulut que les Princes estrangers, ses amis, aliez, & confederez, en fussent aduertis, affin qu'ils eussent en horreur l'iniquité du fait, & ceux qui en auoient esté les instigateurs. Mais Dieu qui auoit autrement disposé de sa vie le retira à soy dés les trois heures du matin du iour suyuant, au grand regret de tous les bons François, qui pleurant la perte d'un Prince si doux & si clement, pleuroient aussi l'estat calamiteux de la France, iugeât qu'il seroit difficile de rasseurer l'Estat de la violente secousse que ce mouuement luy faisoit endurer : & lui-mesme sentant sa fin prochaine, selon qu'il auoit l'esprit vif & prompt, le sceut fort bien remarquer, quand il profera avec souspirs ces dernieres paroles.

Je ne regrette point (dit il) d'auoir peu vescu, i'ay assez vescu puis que ie meurs en Dieu, ie sçay que la derniere heure de ma vie sera la premiere de mes felicitez : mais ie plains ceux qui me suruiuent, mes bons & fideles seruiteurs. Si mes ennemis ont eu leurs esprits tellement abandonnez au mal, que ny la crainte de Dieu, ny la dignité du Prince n'a peu les retenir qu'ils n'ayent attenté à ma personne, qui les fera respecter ceux qui m'ont suyui ? Vne seule chose me console, c'est que ie lis en voz visages, avec la douleur de voz cueurs, & l'angoisse de voz ames, pour l'apprehension de ma mort prochaine, vne belle & louable resolutiō de demeurer vnis, pour la conseruation de ce qui reste d'entier en mon Estat, & la vengeance que vous deurez à la memoire de celuy qui vous a si vniquement aymez. Je ne recherche point curieusement ceste derniere, remettant à Dieu la punition de mes ennemis, & i'ay appris en son escole de leur pardonner, comme ie fais de bon cueur. Mais comme i'ay à ce Roy-aume vne premiere obligatiō de luy procurer sa paix & son repos, Je vous coniure tous par l'iniuolable fidelité que vous deuez à vostre Patrie, & par les cendres de vos Peres, que vous demeuriez fermes & constans deffenseurs de la liberté commune, & que ne posiez iamais les armes que vous n'ayez entierement nettoyé le Royaume des perturbateurs du repos public.



blic. Et d'autant que la diuision seule sappe  
 les fondemens de la Monarchie, aduisez d'estre  
 vnis & conioints en mesme volonté. Je sçay, &  
 i'en puis respondre, que le Roy de Nauarre  
 mon bon frere, legitime successeur de ceste  
 Couronne, est assez instruit és loix de bien re-  
 gner, pour bien sçauoir commander choses rai-  
 sonnables: & ie me promets que vous n'igno-  
 rez pas la iuste obeissance que vous luy deuez.  
 Remettez le differend de la Religio à la conuo-  
 catiō des Estats du Royaume, & apprenez de  
 moy que la pieté est vn deuoir de l'homme en-  
 uers Dieu, sur lequel le bras de la chair n'a  
 point de puissance. A Dieu mes amis, conuer-  
 tissez voz pleurs en Oraisons, & priez pour  
 moy. Voyla à peu pres les derniers propos du  
 Roy, sur lesquels il sanglotta & rendit l'esprit.

Il eut esté bien à desirer que Dieu luy eut  
 prolongé la vie: mais nous ne le meritions pas.  
 Il aura pitié de nous, & nous preseruera des  
 fruits venimeux de ceste sanglante Vnion, qui  
 diuise le sujet d'avec le sujet pour le bander  
 cōtre son Prince: ceux qui les produisent soyēt  
 en éternelle execration aux gens de bien, pour  
 l'enormité & mauuais exemple d'iceux.



COPPIE DES LETTRES  
DE SA MAJESTÉ, ESCRITES  
au Comte de Montbeliard depuis  
sa blessure.



MON Cousin, apres que mes ennemis ont employé tous leurs artifices & deloyautez, pour paruenir au bout de leurs trahisons, voyans que Dieu par sa grace, comme protecteur des Princes, & iuste vengeur de l'infidelité de leurs subiects, prenoit le soing du restablissement de mon auctorité à leur confusion. Ils ont pensé ny auoir plus de salut pour eux que ma mort, & qu'il falloit mettre en execution le dessein de leur conspiration, desia prise de longue main, & n'espargner pour ce faire aucun acte pour barbare qu'il peut estre. Pour à quoy paruenir, s'aidans



s'aidans du zele que ie porte à ma Religion, & du libre accez & audience que ie donne à tous Religieux, pauvres gens d'Eglise, qui veulent parler à moy, & violant soubs ce manteau les loix diuines, & la foy qui doit estre soubs l'habit d'un Ecclesiastique. Ce matin vn ieune Iacobin, amené par mô Procureur General, pour me bailler (disoit-il) des lettres du Sieur de Harlay, premier President en ma cour de Parlement, mon bõ & fidel seruiteur, detenu pour ceste occasion prisonnier à Paris, & me dire quelque chose de sa part, a esté introduit en ma chambre, par mon commandement, n'y ayant personne que le Sieur de Bellegarde, premier Gentilhomme, & mondict Procureur General. Apres m'auoir salüé, & feignant à me dire quelque chose de secret, j'ay fait retirer les deux dessus nommez: & lors ce malheureux m'a donné vn coup de cousteau, pensant bien me tuer: mais Dieu qui a soin des siens n'a voulu que soubs la reuerence que ie porte à ceux qui se disent vouez à son seruice ie perdisse la vie, ains me l'a conseruee par sa grace, & empesché son damnable dessein, faisant glisser le cousteau: de façon que ce ne fera rien s'il plaist à Dieu, esperant que dedans peu de iours il me donnera ma premiere santé. Je ne doute que telle voye ne soit en telle horreur, qu'elle merite à toutes gens de bien, & principalement aux Princes, pour l'iniquité & mauuais exem-

ple d'icelle. Et d'autant que ie vous tiens pour  
l'un de mes bons parens & amis, ie vous ay bien  
voulu aduertir de cest accidēt, m'asseurant que  
vous blasmeriez l'acte, & ceux desquels il peut  
proceder: vous ferez aussi bien aise d'entendre  
l'esperoir de ma briefue guerison, avec l'aide de  
Dieu, lequel ie prie vous auoir, mon Cousin,  
en sa sainte garde. Escrit au camp du pont S.  
Clou, le premier iour d'Aoust, 1589.

Signé

H E N R Y,

Et plus bas

Ruzé.




A V T R E C O P P I E D E S L E T -  
tres du Roy à present regnant , au mesme  
Comte de Montbeliart.


**M** On Cousin, depuis la lettre escrite par le Roy Monseigneur & frere estant blessé, j'auois retenu ce porteur pour vous en mander certaines nouuelles, mais dès le lendemain, qui fut hier, Dieu l'a retiré de ce monde à soy, au grâd regret de tous ses bons Subiets, & de moy principalement, tant pour l'amitié si grande qu'il me portoit, que pour les grandes affaires qu'il m'a laissé en c'est Estat. Ce parricide commis si malheureusement par vn hypocrite Iacobin demande vengeance à Dieu & à tous les Princes & Potentats de la Chrestienté, principalement aux alliez & cōfederez de ceste Couronne. Ce que comme son successeur ie suis deliberé de poursuyure. Pour c'est effect enuoyer bien tost personnage de qualité pour traiter avec tous les Princes de la Germanie, & par mesme moyen avec vous. Cependant ie vous veux bien remercier de tant de bonne vo,

lonté que me demonstrez, de laquelle ie fais estat, m'assurant que comme par cy deuant l'auetz tesmoigné, par cy apres les offices en seront encor plus grands. Ie vous prie, mō Cousin, me la continuer & augmenter, & tenir ce qui est de vostre part tout prest, pour passer le contract & accord. Sur ce ie prieray Dieu vous auoir en sa sainte & digne garde. Escrit au camp du pont saint Clou, ce troisieme iour d'Aoust, 1589.


Mon Cousin, i'ay tousiours fait beaucoup d'estat de vostre amitié, suiuant le rapport qui m'a esté fait par mes seruiteurs, que ie m'assure qu'en ceste occasion vous me rendrez bone preue, estât ma querelle si legitime qu'elle est.


F I N.



























































































f 12







